

**Inunnik annertusisamik innarluutilinnut ikiorsiisarneq pillugu FN-ip innarluutillit pisinnaatitaaffii pillugit isumaqatigiissutaanut naapertuunnerusumik Naalakkersuisut iluarsaatamik inatsisilioqqullugit Inatsisartut aalajangiiffigisassaattut siunnersuut, taamaalilluni pisinnaatitaaffiit teknikkitugit inatsisinut attuumassutilinnut atuuttussanngorlugit aaqqissuunneqarlutik, allannguut kingusinnerpaamik UPA2017-imi saqqummiunneqassaaq.**

(Inatsisartunut ilaasortat, Siumut)

**Naalagaaffiit Peqatigiit inuit innarluutillit pillugit Isumaqatigiissutaanni pisinnaatitaaffiit siuarsarneqarnissaannut Naalakkersuisut peqquneqarnissaannik Inatsisartuni aalajangiiffigisassatut siunnersuut, tamatumani inatsimmi pineqartunut atuuttumut atuutsinneqalernissaat aammalu suliat ingerlanneqarnerini Naalagaaffiit Peqatigiit inuiat innarluutillit pillugit Isumaqatigiissutaanni Kalaallit Nunaanni atuuttut suliarineqarnerini iliuusissatut pilersaarutinut ilanngullugit suliarineqarnissaat.**

(Inatsisartuni eqimattat, Inuit Ataqtigiit)

### **Akissuteqaat**

(Ilaqutariinnermut, Naligiissitaanermut Isumaginninnermullu Naalakkersuisuni ilaasortaq)

### **Aappassaaneerpeqarnera**

Ilaqutariinnermut Peqqissutsimullu Ataatsimiititaliap qujassuteqarfigiumavaa siunnersuutit matumani pineqartut pillugit sukumiisumik suliaqarsimanerannik, aammalu iluarisimaarlugu siunnersuutit pineqartut tamagiinnit taperserpeqarsimanerat pillugit.

Ataatsimiititaliap tikkuarpaa innuttaasut innarluuteqartut sanngiissuteqarnertik pissutigalugu immikkut ikiorserneqartariaqartartut, tamannali Naalakkersuisut isumaqatigilluinnarpaat. Naalakkersuisut eqqumaffigivaat innarluutillit ulloq unnuarlu angerlarsimaffinni najugaqarfeqartut immikkut paaqutarineqartarnissaat pillugu aammalu eqqumaariffigalugu apeqqutaatillugulu qassinik ukioqarnertik inuttullu immikkut atugarisatik toqqammavigalugit qanoq immikkut ikiorserneqartariaqarnersut. Taamaattumik ilaatigut Naalakkersuisut suliarisimavaat maleruagassat assigiinngitsut, soorlu ulloq unnuarlu angerlarsimaffinni atoqatigiittarnermut politikki. Taakkunani sulisuusut ilisimaarissavaat Innarluutillit pillugit Isumaqatigiissummi artikili 17, inuttut kinaassuseq toqqammavigalugu mianerinninnissaq, artikili 22, inuttut nammineersinnaassuseqarnermut ataqqinninnissaq aammalu artikili 23, angerlarsimaffimmi ilaqutariissuttitigullu mianerinninnissamut tunngasoq. Tamatuma saniatigut ulloq unnuarlu angerlarsimaffiit pisussaaffeqarput pissuserissaarnissamut, atisat suut atorineqarnissaanut aammalu pissuserineqartartut pillugit najugaqarfinnut najugaqartunullu naapertuuttunngorsarneqarsimasut pillugit aalajangersaanissamut. Tamatumani pineqarput nunatsinni ulloq unnuarlu angerlarsimaffiit tamarmik.

Naalakkersuisut ilisimatitsissutigisinnaavaat piareersaasiulersimagamikku UPA 2016-mut Innarluutillit pillugit nalunaarusiornissartik. Tamatumani aallaavigineqassalluni Naalagaaffiit

Peqatigiit inuit innarluutillit pillugit aalajangersagaanni inassuteqaatigineqartut taamaasiornikkullu qulakkeerniarumallugu inatsisissap suliarineqarnissaanut tunngatillugu sukumiisumik piareersaasiortoqarnissaa. Suliap ingerlateqqinneqarnissaani Naalakkersuisut qulakkeerusullugu piareersaasiortaat sapinngisamik innuttaasut pisortallu oqartussaaffigisaasa assigiinngitsut sapinngisamik annertunerpaamik suliamut tapitartuuneqarnissaat. Naalagaaffiit Peqatigit aalajangersagaa artikili 33 pillugu pingasoqiusamik suleqatigiinnisaaq Ilaqutariinnermut, Naligiissitaanermut Isumaginninnermullu Naalakkersuisoqarfimmit, Nunatsinni Inuit Pisinnaatitaaffii pillugit Siunnersuisoqatigiinnut aammalu Dansk Institut for Menneskerettigheder, suliami matumunnga tunngatillugu tapitartuussilluarnissaat naatsorsuutigineqarluni.

Naggataatigit Naalakkersuisut tungaanniit taanngitsoorusunngilarput maannakkorpiaq eqqoriaruminaatsikkatigit inatsisip aaqqissuussiffigeqqinneranut tunngatillugut aningaasatigit kingunerisassai qanoq isikkoqarumaarnersut. Isumaliuutissiissutip kisiat tikkuarpaa, inatsisip suliarineqarnissaanut tunngatillugu qanoq aningaasartuuteqartoqarsinnaanissaa pillugu. Tamatumani ilanngunneqarsimanatik inatsisip akuerineqareerluni atuutilersinniarnernut tunngatillugu qanoq annertutigisumik aningaasartuuteqarfiusussaassanersoq.

Aningaasartuutit pineqartut annertuseriaatissaat piffissami aggersumi inatsisissap suliarineqarneranut atatillugu qaqilersorneqarumaarput. Tassami aamma inatsisissap akuerineqarnissaanut ilanngullugit nalilersorneqareersimasariaqarmata aningaasatigit malitsigisassai qanoq annertutigiumaarnersut. Aningaasaliissutissat tamatumani pisariaqartinneqartut aningaasanut inatsisissani arlalinni tulleriarinnittarnissani inissaqartinneqarnissaat isumaginiarneqartariaqarumaarluni.

Taamatut Naalakkersuisut sinnerlugit oqaaseqarlunga inassuteqaatigissavara siunnersuutigineqartut akuersissutigineqassasut.